

ՍԻԼՎԱ ԿԱՊՈՒՏԻԿՅԱՆ

ՀՈԳԵՀԱՆԳԻՍՏ

Լուսինն Զաքարյանի հիշատակին

Խորանի առջև, Աստվածամոր դեմ
Սպիտակ մի մոմ՝ խոշոր ու վերձիգ,
Սպիտակ մի մոմ կայծկլտում է մեղմ —
Սպիտակ հագած փխրուն մի աղջիկ:

Ու մոմի ծայրին՝ բոցի փոխարեն,
Լուսի փոխարեն ձայն է թրթռում
Հալիվոդ մոմից «Սուրբ-սուրբ» է ծորում,
Պահ առ պահ հատնում, այրում ինքն իրեն:

Դրսում զանգերն են դողանջում տխուր,
Մայր Էջմիածնից մինչև Գանձասար,
Ծունրը է իջել ու խունկ է ծխում
Աղոթքով լցված մի հայ ներաշխարհ.

Տե՛ր, ընդունելի՛ արա մեր զոհը,
Տե՛ր, քե՛զ է մնում մեր բախտը ու մենք.
Վառել ենք քո դեմ մեր վերջին մոմը,
Դրանից մաքուր էլ ոչինչ չունենք...

22.01.1993 թ.

